





新時代民衆叢書

中國國民黨史略

華林一著





中國國民黨史略

一

中國國民黨自前清末年迄於今日，繼續發展，已成爲極完備之革命政黨，不惟有一定之主義，有甘爲主義而奮鬪犧牲之黨員，且有嚴密之組織。然其所以能至若是之完備者，亦非一朝一夕之功，乃數十年努力之結果也。故吾人苟欲澈底了解國民黨今日之情狀，非研究國民黨過去之歷史不可。研究國民黨史之方法，一面須依時代先後敘述黨之種種經過事實，一面更須將各時期之思想，組織，行動等互相比較，以明其進化之迹。國民黨自最初創立以迄今日，其經過之事實，約

可分爲七期：一曰興中會時期；二曰同盟會時期；三曰民元組織之政黨國民黨時期；四曰中華革命黨時期；五曰護法非常國會時期；六曰十三年改組之中國國民黨時期；七曰排共時期。

二

滿清末年，政治腐敗，內憂外患，相繼而作，有志之士，咸知非傾覆清廷，創建民國，不足以挽回頹勢。時有孫中山先生者，出而領導革命運動。中山先生名文，字逸仙，以逃亡日本後改名中山樵，故通稱中山先生。先生生於廣東香山，自幼即抱革命大志。甲午中日戰起，先生赴檀香山，集合同志，創立興中會，宗旨在「聯絡中外有志華人，講求富強之學，以振興中華，維持團體。」所謂振興中華者，當指推翻滿清，創立新國家而言，故民族主義之色彩最爲濃厚，民權民生皆未提及。會之組織，

雖已粗具，然甚簡單，以覺悟之華僑及會黨爲革命之基本勢力，而華僑入應者寥寥，僅得鄧蔭南及其胞兄德彰願傾家相助。

甲午中日之戰，清兵大敗，人心憤激，中山先生乘機偕同志鄧蔭南等數人歸國，開乾亨利於香港，設農學會於廣州，謀三路進兵，一舉而奪廣州，以爲以後革命根據地。乃以運械不慎，事洩而失敗。中山先生由日本經檀香山至美國，又自美至英，被吾國駐英使館誘拘，欲私送回國，幸得英人康德黎之救，始獲釋放。脫險後，即客居英倫，完成其三民主義。旋至日本，命同志四出活動。北方義和團事發生時，中山先生擬入粵舉事，以香港台灣不得登岸而已。鄭士良率惠州大鵬山附近山寨之衆起事，連戰皆捷，以軍械接濟斷絕而敗。同時史堅如謀炸兩廣總督德壽之署，未中，黃興舉事長沙，亦未獲成。

清光緒三十年，中山先生重至歐洲，歐洲留學生已多數贊成革命，先生乃揭發生平所懷抱之三民主義五權憲法以號召之，組織革命團體，開會三次，加盟者六七十人。後自美至日本，適黃興、宋教仁等亦亡命在日，歡迎中山先生於東京之富士樓，乃合廣東派之興中會，黃興、宋教仁等湖南派之興華會，章炳麟等蘇浙派之光復會，組織空前之革命同盟會，加盟者數百人，中國十八省除甘肅省外，皆有入盟。同盟會以中山先生爲首領，黃興爲副首領。中華民國之名稱，卽於是規定。由是革命之潮流日高，不一年而加盟者已逾萬人，支部先後成立於各省。

同盟會之宗旨在驅除韃虜，恢復中華，建立民國，平均地權。觀此四綱，可知同盟會時代之思想，已與興中會時代之思想大異。興中會時代，民族思想最爲昌盛，

至同盟會時代，則更顧及民權主義與民生主義，三民主義已大體俱備矣。此中山先生西遊之結果也。其自傳曰：「倫敦脫險後，即暫留歐洲，以實行考察其政治風俗，並結交其朝野賢豪。兩年之中，所見所聞，殊多心得。始知徒知國家富強，民權發達，如歐洲列強者，猶未登斯民於極樂之鄉也。是以歐洲志士，猶有社會革命之運動也。予欲爲一勞永逸之計，乃採取民生主義，以與民族民權問題同時解決。此三民主義之主張之所由完成也。」蓋同盟會軍政府宣言中之所謂驅除韃虜，恢復中華，即民族主義之表現也；建立國民皆平等皆有參政權之民國，即民權主義之表現也；平均地權，則民生主義之表現也。三民主義已大致粗具，惟猶未完備耳。

同盟會爲真正之革命黨，除以民報等文字宣傳外，復積極行動。黃興等回湖南，謀三路進兵，事洩而敗。中山先生與汪精衛、胡漢民至安南，設機關於河內，聯絡會黨，謀劫黃岡協署軍械以起事，曾佔協署，克寨城，爲潮洲鎮兵擊敗。同時鄧子瑜

在惠州七女湖起事，亦未成。會廣州三那地方有萬人會之抗捐，欽州又有張得清之起事，革命軍謀乘機發動，以軍器輸運計劃破壞而敗退。中山先生及黃興胡漢民等並法國軍官，改由安南進攻廣西，襲取鎮南關，戰三日，佔領鎮南、鎮東、鎮北三礮臺，亦於軍火不繼而退。河口之役，連佔要隘，清兵投降者達五千人。後以黃興中途被阻，革命軍指揮無人，故卒不支。清宣統二年，中山先生在庇能，決定大舉於廣州，其時粵省武備廢弛，不難獲勝，不意內情爲奸細密告，粵督加意防範，並嚴厲搜索，致革命軍不能有充分之準備。起事之後，雖攻破督署，卒以清軍援師雲集，衆寡不敵，革命健將殉難死者，凡七十二人，同葬黃花岡，而黃興、朱執信、熊克武、王以通等亦皆負傷。此卽中國革命史上最著名之黃花岡之役也。此外尚有汪精衛之刺攝政王，溫才生之刺廣東將軍孚琦，林冠慈、陳敬岳之彈炸李準，亦轟轟烈烈之革命行動也。

四

自廣東一敗再敗，革命黨人乃轉而謀武漢，聯絡新軍，於辛亥八月十九日（即陽曆十月十日）起義，連佔武昌、漢陽、漢口三鎮。各省紛紛響應。未幾而南京亦爲革命軍所得。各省代表在南京組織臨時政府，舉孫中山先生爲臨時大總統，黎元洪爲副總統。旋清帝退位，中山先生辭職，參議院乃舉袁世凱爲臨時大總統，南北統一。時各派羣起組織政黨，以奪取政權，抱革命主義之中國同盟會，亦改爲公開之政黨，以「完成行政統一，促進地方自治」，「實行種族同化」，「採用國家社會政策」，「普及義務教育」，「主張男女平權」，「勵行徵兵制度」，「整理財政，釐定稅制」，「力謀國際平等」，「注重移民開墾事業」等九項爲政綱。

民國元年八月，臨時參議院氣燄甚高，議員競爭甚烈。時大小政黨林立，接洽

非易，各大黨欲謀擴張勢力，皆設法併合小黨。同盟會宋教仁遂亦謀併合與同盟會主義相接近之統一共和黨、國民共進會、共和實進會及國民公黨。由五黨各舉委員，協議合併計劃與進行事項。協議結果，衆意僉同，乃於八月二十五日舉行正式成立大會，改名國民黨。以「促進政治統一」、「發展地方自治」、「實行種族同化」、「注重民生政策」、「維持國際和平」五項爲政綱。時國民黨之領袖人物，專圖黨勢之擴張，不思主義之貫徹，故將同盟會時代之國家社會政策男女平等權等主張悉行拋棄，以遷就其他四小黨黨員之政見，由急進變爲漸進，由革命黨變爲普通政黨。其組織全爲普通政黨組織之形式，有理事九人，參議三十人，候補參議十人。

民國元年，國民黨實力甚厚，山西都督閻錫山，陝西都督張鳳翔，江西都督李烈鈞，安徽都督柏文蔚，湖南都督譚延闓，四川都督尹昌衡，廣東都督胡漢民，廣西

都督陸榮廷，皆隸國民黨籍。故元年十二月與二年二月參眾兩院初選復選告竣以後，總計各黨所獲議員，國民黨竟佔絕對多數，共得參眾兩院議席三百九十有二。

國民黨之獲勝利，甚觸袁世凱之忌，袁氏乃組織大與黨，用金錢收買國民黨中意志不堅定之黨員，以厚己方之力，並秘密派人暗殺宋教仁，使國民黨失去領袖。於是偉大之國民黨，遂致四分五裂，發生相友會、政友會、癸丑同志會、集益社、超然社等五小政團，舊日之勢力全失，一任袁氏之玩弄。自二次革命失敗以後，袁氏益形專橫，對於在北京之國民黨黨員，屢加重大之壓迫，逼吳景濂削除黃興、李烈鈞、柏文蔚、陳其美等黨籍，以串通亂黨為名，逮捕國民黨議員朱念祖、張我華、丁象謙、高蔭藻、常恆芳、褚輔成、劉恩格等七人。時國民黨議員猶欲作最後之奮鬪，謀制定憲法以限制袁氏帝制自為之野心。袁氏深知之，乃於民國二年十一月四日，假

二次革命爲內亂之名，以武力解散國民黨，取消國民黨籍之國會議員，追繳議員之證書徽章。初追繳三百五十餘人，兩院猶足法定人數，有開會希望；繼又追繳二次革命前已退出國民黨籍者八十餘人，使國會不足法定人數，事實上遂陷於消滅。袁氏後復下令停止兩院職務，國會遂完全廢止，國民黨與他黨同歸於盡。

五

民元之改同盟會爲國民黨，無異將革命黨改爲普通政黨，拋棄本來之革命政策，而改用議會政策。然自二次革命討袁失敗以後，國民黨被袁氏以武力解散，議會政策遂完全失敗。孫中山先生知袁氏之將帝制自爲，覺有恢復同盟會時代之革命精神之必要。且自同盟會改組爲國民黨後，範圍雖見擴張，然精神全非，黨員複雜，官僚敗類混雜其間，以致內部意見紛歧，一無所成。故決意恢復民國以前

之本來面目。乃解散政黨國民黨，於民國三年重組中華革命黨於日本，標出革命二字，重整旗鼓，以與惡勢力奮鬪。當時入黨手續極嚴，黨員均須立誓服從中山先生命令，以求黨內之一致，蓋其時舊同志多已灰心，故不得不然也。黨既組成，乃散布黨員於各省，作反對帝制之宣傳，故袁世凱帝制未成，而反對之人心已備，帝制一發，各省即起而撲滅之。

袁世凱以軍警包圍國會而獲選爲正式總統，復僞造民意，推翻共和，帝制自爲，全國反對。中山先生在東京與陳其美議決，欲以廣東爲發難之地，舉兵討袁。陳其美路過上海，革命黨同志以上海方面海陸軍聯絡極多，頗有希望，陳亦以上海確有可爲，乃謀先舉事於上海。不成。未幾，雲南卽有唐繼堯蔡鍔之護國軍之起義。唐蔡反對帝制，於四年十二月二十三日致電袁世凱，請誅帝制禍首，以謝天下，限二十五日上午十時以前答覆。屆時竟無覆電，遂於二十五日通電各省，宣布獨立。

組織護國軍，以蔡鍔爲第一軍總司令，李烈鈞爲第二軍總司令，分三路出兵，向川邊、湘邊、桂邊進攻。各省紛起響應，先後宣告脫離中央。袁世凱羞憤交集，於五年五月六日病死於新華宮。黎元洪依法繼任爲大總統，南方軍政府宣告撤銷。各省亦取消獨立，一致擁護中央。

共和再造南北統一以後，參衆兩院同時開會，而沉寂三年之各政黨，復乘機而起，政黨國民黨亦因而復活，儼然有民國元年之氣象。國民黨系全體，經張繼諸人之斡旋，曾爲一度之結合，組織憲法商榷會，在國會中佔議席四百，宛若一大政團。然內部分子頗複雜，含有客廬、丙辰俱樂部、韜園三系。客廬系屬國民黨之穩健派，由張繼所領袖之一團體爲中心，谷鍾秀系加入最早，吳景濂系旋亦加入，黨員共二百六十七人。丙辰俱樂部系多爲舊國民黨中之急進分子，在國會中似可代表孫中山先生之精神，黨員約五六十人，以林森、居正、田桐等爲主要人物。韜園系

爲舊進步黨中孫洪伊、丁世嶧之一派，黨員亦約五六十人。此三系之結合，本不堅固，故易分裂。客廬系中之谷鍾秀、張耀曾一派，對於段祺瑞內閣以利益關係，主張擁護，而丙辰俱樂部與韜園兩派，則主張破壞，復以其他意見之衝突，谷、張等遂脫離客廬派而別組政學會。客廬系之嫡派人物如張繼、吳景濂、王正廷等，亦復改組爲益友社，而丙辰俱樂部與韜園又離益友社而獨立，憲政商榷會遂完全消滅。後韜園與丙辰俱樂部派之馬君武、溫世霖諸人結合，改組爲民友社，以反對段內閣之外交政策，在國會中甚爲活動。

六

袁世凱死後，黎元洪繼任爲大總統，以段祺瑞爲內閣總理。段祺瑞應協約國之請，主張對德宣戰，黎元洪不以爲然。國會中之國民黨議員，亦竭力反對段氏之

政策，致段氏提出對德宣戰案於參衆兩院時，亦未得兩院之通過。段氏怒國民黨議員之牽制，運動各省督軍，聯合呈請黎總統，催開軍事會議，解散國會。黎下令免段祺瑞職，督軍團大譁，黎乃電召安徽督軍張勳來京商國是，致發生復辟之事。復辟之亂平後，段祺瑞重行組閣，憤國會不通過對德宣戰一案，故不將國會恢復，另行召集臨時參議院，致立法機關依然中斷。西南各省遂起而宣布護法，舊國會議員紛紛南下，乃開非常會議，議決組織軍政府，舉孫中山先生爲海陸軍大元帥，唐繼堯陸榮廷爲副元帥。

南方既召集國會，昔日之國民黨分子，悉集於廣州。然此時政黨分子複雜，不能一致。若加分析，則南方國會實有政學會、益友社、民友社、新新俱樂部等派別。政學會系自稱爲舊國民黨之穩健派，實則由南關五十號派與石行會館派合併而成。南關五十號派爲民五政學會之一部分，在北京時曾與研究系攜手。以岑春煊

爲首領，張耀曾、谷鍾秀爲頭腦，利用莫榮新爲傀儡，以攫取南方政府之一切實權。石行會館派一部出於北京平社，會由共和黨併入進步黨者，一部出於北京制憲時之憲法研究會，與民友社系絕不能相容。益友社系之機關部，卽爲裕寓，號稱國民黨嫡派之溫和派，爲南方國會中之惟一多數黨，由憲法商榷會分組而成，桂系與之頗表同情。民友社以照霞樓爲機關部，係舊國民黨嫡派中之急進派，由三部分分組而成：一爲由中華革命黨而丙辰俱樂部所改組之民友社；一爲由脫離進步黨之分子所組織之韜園俱樂部，後併入民友社；一爲共和派。新新俱樂部與益友社民友社同稱國民黨議員，純爲新補兩院議員之集團。

時北洋派亦分直皖兩系，直系主張議和，皖系主張用兵，以武力統一西南。南方之政學會系傾向議和，桂系主張聯直，與孫中山先生之純粹護法宗旨，截然不同。民國七年五月，南方軍政府改組，推定岑春煊、唐紹儀、伍廷芳、唐繼堯、林葆懌及

中山先生七人爲總裁，岑春煊爲首席總裁，桂系及政學會系大獲勝利。中山先生辭職離粵赴滬。

未幾，北方直皖戰起，廣東莫榮新欲借攻閩爲名，乘機剷除中山先生派陳炯明所部之粵軍。陳乃在漳州誓師，分三路向粵邊攻擊，占領潮梅河源，進逼惠州。西江北江革命軍起而響應，桂系勢窮力竭，岑春煊乃通電解除軍府之職，莫榮新率桂軍退出廣州。粵局大定，中山先生及國會議員相繼返粵。國會議員開非常會議，議決中華民國政府組織大綱，選舉中山先生爲大總統。中山先生復命陳炯明率所部進窺梧州，命許崇智由北江入桂夾擊，命李烈鈞谷正倫進攻桂林。未幾而廣西全省全入護法政府之勢力範圍以內。

兩粵既定，孫大總統卽擬乘時北伐，以貫徹護法之初衷，乃提出北伐案於國會，經國會開非常會議通過。孫大總統命陳炯明先返廣州，擔任北伐軍後方接濟

之責，已在桂林組織大本營，統率各軍北伐。在桂數月，陳氏竟毫未與以餉彈之接濟，諸將乃決定改道北伐，移大本營於韶關，回兵廣東，向北江進發。北伐軍在韶關誓師以後，分三路向贛邊進攻，開戰後節節勝利，庚嶺以北，南安一帶，次第克復，贛州亦被攻陷。孰料北伐軍深入江西之際，陳炯明受吳佩孚指使，派兵圍攻總統府，孫大總統避居楚豫艦，率艦隊集中黃埔，準備進攻，並飛調北伐軍回師平亂。北伐軍回師討伐陳炯明，以前後腹背受敵，戰事不利。孫大總統以株守省河，有損無益，乃離粵赴滬，另圖補救。

時廣東全入陳炯明之手。陳氏倒行逆施，民衆紛紛請孫中山先生與師討伐。中山先生乃令進佔閩邊之北伐軍許崇智、黃大偉、李福林等部進剿潮仙，令滇軍張開儒、楊希閔、朱培德、桂軍沈鴻英、劉震寰等部取道梧州入粵。陳軍大敗，乃率部衆退走東江。楊希閔、劉震寰等迎中山先生返粵，復任大元帥之職。中山先生欲貫澈

初志，繼續北伐，乃因東江陳部殘軍之掣肘，始終未獲成功。

七

一九一七年俄國共產革命之成功，對於國民黨有極大之影響。俄國革命何以能奏如此捷速之成功？中國革命先於俄國，何以至今毫無結果？細加研究，則知俄國革命之成功，由於俄國共產黨之有嚴密之組織，有嚴格之紀律。中國革命之所以不能成功，以革命黨無良好之組織與嚴格之紀律也。蓋無良好之組織，則雖有一定之主義，亦不能實現。是故欲革命之成功，宜先整頓黨之組織。孫中山先生乃派蔣介石等赴俄實地考察，研究共產黨之組織及赤衛軍之訓練，以爲改組之準備。中山先生在桂林督師時，蘇俄派代表馬林來見；十一年，先生派廖仲愷至日本與蘇俄代表會商，遂與蘇俄提攜。蘇俄共產黨之經驗，對於國民黨大有助也。

自中華革命黨解散以後，孫中山先生即有改組中國國民黨之意，以時機未至，故遷延而未實行。至十二年一月一日，乃發表中國國民黨宣言，實改組之先聲也。宣言首論三民主義之歷史的背境，次述國民黨努力之經過，再次則述對國家建設計劃及現所採用之政策。謂「今清廷雖覆，而我竟陷於列強殖民地之地位。」故國民黨之「民族主義」，消極的為除去民族間之不平等，積極的為團結國內各民族完成一大中華民族。」其所採之政策，一為「勵行普及教育，增進全國民族之文化。」一為「力圖改正條約，恢復我國國際上自由平等之地位。」民權主義之政策，一為「實行普選制度，廢除以資產為標準之階級選舉。」一為「以人民集會或總投票之方式，直接行使創制、複決、罷免各權。」一為「確定人民有集會、結社、言論、出版、居住、信仰之絕對自由權。」民生主義則並重平均地權與節制資本。

觀此宣言，可知國民黨之思想已有極大之進步，三民主義至是始清楚詳密。以前所謂民族主義者，祇求脫離滿清之壓迫，今則民族主義運動之目的，在脫離一切帝國主義之壓迫，廢除一切不平等條約，并團結國內各民族以成一大中華民族。如是，而民族主義之理論遂完成矣。以前所謂民權主義者，祇求政體上之改革，今則政府方面有五權憲法之規定，人民則於間接民權之外更有直接民權，即所謂選舉、創制、複決、罷免四民權是也。如是，而民權思想遂有具體的表現。以前所謂民生主義者，祇有平均地權之主張，後見中國資本主義亦漸發達，乃更加節制資本之主張，而民生主義之理論遂亦完成。次年中國國民黨第一次全國代表大會宣言及大會中所定之政綱，則又此具體的一貫思想之結晶也。

民國十三年一月，中山先生召集全國及海外國民黨同志代表，在廣州開第一次大會，決定黨中總章，規定施行之政綱，容許中國共產黨黨員全體加入。大會

中又討論宣言書，經數次之修改，始行決定。此宣言書爲國民黨思想之結晶，在中國國民黨史上極關重要。宣言首述中國之現狀，次指摘各派之錯誤，再次解釋國民黨三民主義之真義，與十二年一月一日所發布之宣言末段無大異，最後則述國民黨之政綱，計總綱四條，對外政策七條，對內政策十五條，即中國國民黨現行之政策也。

十三年一月全國代表大會通過中國國民黨總章以後，散漫之國民黨，遂有極完善極有系統之組織。中國國民黨之最高機關爲全國代表大會，每年舉行一次。在其閉會時期，則以中央執行委員會爲最高機關。中央執行委員會又分政治委員會、教育委員會等特殊委員會。中央執行委員會之外，有中央監察委員會，稽核中央執行委員會財政之出入，審查黨務之進行情形及部員之勤惰，訓令下級黨部審核財政與黨務，稽核在中央政府任職之黨員。中央執行委員會設有中央

黨部內分組織、宣傳、工人、農民、商民、青年、婦女、海外八部。中央黨部之下，各省有省黨部，特別地方有特別地方黨部，重要都市有特別市黨部，此外縣有縣黨部，市有市黨部，區有區黨部，區黨部之下又有區分部，則國民黨之基礎機關也。此外特別機關中尚有特別黨部之組織，在祕密公開或半公開之非黨團體內尚有黨團之組織。由此觀之，改組後中國國民黨之組織，遠較未改組以前爲完備。

國民黨改組時期中尚有一重要之事，即正式黨軍之養成也。中國革命經數十年而不能成功者，其最大之原因，在於無真正之革命黨軍。因無真正之黨軍，故每次革命，非藉臨時烏合之民軍，即利用舊有之軍隊。烏合之民軍既無訓練，自無戰鬥力之可言，自不能戰勝敵軍；舊有之軍隊，本因一時之利益而投順，至時過境遷，復成革命軍之敵人。藉如此軍隊以革命，雖或幸得一時之勝利，終不能保持久遠。孫中山先生鑒於屢次革命之失敗，乃遣蔣介石赴俄考察赤衛軍之編練方法。

十三年，蔣氏歸國後，中山先生即委任其爲黃埔陸軍軍官學校校長。此校後改稱中央軍事政治學校，對於校中學生，除專授以軍事之學理與實習以外，復授以政治上之知識。入校學生，須有中學畢業以上之程度。此校之目的，在養成具有革命精神、高尚志趣、健全身體及應有智能之革命軍陸軍軍官，以爲以後革命事業之中堅人材。此校畢業之學生，既明白主義，甘爲主義而戰，甘爲主義犧牲，故皆驍勇絕倫。其後解散商團軍，驅逐陳炯明之殘部，擊破楊希閔之滇軍與劉震寰之桂軍，皆畢業是校軍士之力也。

八

民國十一年第一次直奉戰爭以後，直派勢力大張，謀擁其首領曹錕爲總統，驅逐黎元洪，以巨款收買議員，曹錕遂獲選爲大總統。曹錕賄選告成，孫中山先生

首先起而反對，時奉天張作霖與浙江督軍盧永祥亦反對直派之舉動，乃有所謂奉浙粵三角同盟。旋江浙戰起，廣東方面組織北伐軍，出發北伐，奉天同時亦爲軍事之準備，分兵三路入關。直派曹錕吳佩孚以彭壽莘王懷慶馮玉祥率兵分三路迎擊。當山海關戰爭最激烈之際，直軍第三軍總司令馮玉祥與陝西陸軍第一師師長胡景翼，熱河都統米振標等，忽班師回京，與京畿警備副司令孫岳聯合，發布停戰主和通電，要求曹錕頒停戰令，懲辦主戰人物及附和者，召集全國各省代表，共決時局問題。由是曹錕被囚，吳佩孚由唐沽乘輪入長江，退居岳州。

曹吳覆滅以後，時局之應如何解決，頓成一大問題，各方主張紛紛，莫衷一是。國民黨主張召集國民會議，集全國各團體之代表開會討論，以謀和平統一。在國民會議召集以前，主張先召集一預備會議，決定國民會議之基礎條件及召集日期選舉方法等事。預備會議以現代實業團體、商會、教育會、大學、各省學生聯合會、

工會、農會、共同反對曹吳各軍及政黨之代表組織之。國民會議之組織，其團體代表與預備會議同，惟人數較多，代表須由各團體團員直接選舉耳。

孫中山先生爲謀中國之和平統一，并應國民軍馮玉祥、胡景翼、孫岳諸將領及一般國民之請，乃於十三年十一月十三日離粵北上。十七日抵上海，宣布政見，說明此次北上之主張在開國民會議，以解決國內人民生計問題與廢除不平等條約兩大事。旋由上海繞道日本赴津，於十二月四日抵天津。以長途旅行，又受寒冷氣候之襲擊，遂受感冒，并誘發舊有之肝病。十二月三十一日抱病入京，病勢日益增重，徧延醫生診治，皆未見效。國民黨同志知先生之病已絕望，多主張預備一張遺囑，以備萬一危急時由先生簽字，作黨中永遠遵守之信條，衆推汪精衛預備此事。及病勢危急，汪精衛乃攜所預備之紙徵中山先生同意，先生表示滿意，簽字其上。中山先生病勢日重，延至十四年三月十二日晨九時三十分，竟與手創之中

華民國長辭。

中山先生離粵北上以後，以胡漢民任代帥之職。時北伐軍猶在贛境作戰，陳炯明擬乘機聯合林虎、方本仁進攻廣州，胡代帥乃令粵軍總司令許崇智等進攻東江。許崇智調黃埔新軍四千餘人加入戰爭，並委參謀長蔣介石為總指揮。時雖遭中山先生之喪，而許蔣部兵士仍奮勇作戰，連獲大勝，陳炯明率部退出廣東，潰走閩邊。時雲南唐繼堯令所部進攻桂邊，並聯絡在廣東之滇軍首領楊希閔，桂軍首領劉震寰，謀合力推倒廣東政府，消滅國民黨。胡代帥下令免楊希閔、劉震寰之職，飭各軍合力討伐，楊劉戰敗，相繼出走。陳炯明系軍隊之乘虛進占東江，復被驅逐至閩邊。廣東全省，遂完全統一。

十四年初，廣西軍隊分沈鴻英與李宗仁、黃紹雄兩派。李黃服從大元帥命令，時沈鴻英頗欲獨霸廣西，設法消滅李黃部隊，李黃聯絡粵軍李濟琛與沈鴻英戰，

沈軍敗，退入湘粵邊境，廣西全省，亦告統一。

兩廣統一以後，國民黨同志乃擬出師北伐，以遂中山先生之遺志。國民政府軍事委員會任蔣介石爲國民革命軍總司令，蔣氏於十五年七月九日正式就職。時湘省第四師長唐生智爲第三師長葉開鑫所敗，派代表至粵，表示輸誠。蔣乃委唐生智爲國民革命軍第八軍軍長兼前敵總指揮，率湘軍由湘攻鄂，並調第四軍陳銘樞張發奎兩部第七軍李宗仁部往援。激戰數日，葉軍潰敗，革命軍遂得長沙。蔣介石以軍事勝利，乃令粵方革命軍大隊趕赴前線，已亦由韶關轉道入衡。指揮各軍進攻。各軍由湘邊分路進攻湖北，連敗吳佩孚之軍，直抵武昌，攻占漢口，漢陽，並乘勝追擊至武勝關以北，吳佩孚率殘部退入豫境。

湘鄂克復以後，蘇、浙、皖、閩、贛五省聯軍總司令孫傳芳陳兵贛邊，頗有攻取長沙截斷革命軍後路之意。蔣介石乃率革命軍自長沙直趨江西萍鄉，在萍鄉設立

大本營正式與孫傳芳開戰。激戰數十日，卒將孫軍擊敗，收復江西全省。時東路革命軍自粵東出發，已將福建全省收復，乃會同江西之革命軍進攻浙江，不一月而占領浙江全省。浙江既下，革命軍乃分路進攻江蘇。時孫傳芳部已退駐江北，滬寧一帶，歸魯軍布防。革命軍與魯軍交戰以後，魯軍大敗，滬寧一帶，全入革命軍之手，江南大定。

江南底定以後，革命軍仍繼續北伐。漢口方面之革命軍，出武勝關北進，與奉軍激戰於豫境，奉軍大敗，退住黃河以北。南京方面之革命軍，亦分路北伐，擊敗張宗昌、孫傳芳之殘部，克復徐州、海州。不幸黨內糾紛日甚，致軍事大受影響，肅清軍閥統一全國之事，乃不能於最短時期內實現。

俄國共產革命成功以後，世界各國幾皆有共產黨之組織。中國之共產主義團體有二：一曰中國共產黨，一曰中國共產主義青年團，皆爲第三國際黨之支部。惟中國共產主義青年團於政治上須受中國共產黨之指揮，故實爲一團體。主張直接行動，階級鬭爭，無產階級專政，打倒帝國主義與資本主義，一切經濟皆歸公有。民國十三年中國國民黨之改組，容納中國共產黨黨員全體加入，共產黨以己黨勢力未厚，多數國人猶怕聞「共產」二字，不能作公開之宣傳，故願加入國民黨。

然共產黨之主張與手段，究與國民黨不同。國民黨員馮自由等於容納共產黨員案提出之時，卽表示反對。待共產黨員正式加入國民黨後，兩黨黨員時有暗鬭，惟中山先生在世之時，猶未甚烈，及中山先生逝世，暗鬭乃日益劇烈。

時國民黨內共產派聲勢漸高，一部分國民黨中央執行委員會委員，急謀抵

制，遂於十四年十一月二十三日在北京西山中山先生靈前開中央執行委員會全體會議，通過取消共產黨員在國民黨之黨籍，政治顧問俄人鮑羅庭解雇，中央執行委員會移滬等決議，蓋以共產黨員加入國民黨後，在主義上只作以階級鬥爭爲中心之宣傳工作，在組織上利用國民黨之軀幹發展共產黨之勢力，不受國民黨之管理，仍聽共產黨機關之指揮也。廣州方面以西山會議不足法定人數，對其決議不加採納，於是戴季陶、張繼、葉楚傖、邵元冲、沈定一、林森、鄒魯、覃振、茅祖權、居正、張知本、石青陽等在上海設立國民黨中央執行委員會，以爲抵制。時又有傅汝霖等在北京組織孫文主義學會，設支部於各地，專以闡明三民主義排斥共產主義爲目的。廣州國民黨非共產派要人，雖未採納西山會議之決議，而對於共產黨之活動，亦嚴加防範，尤以中山艦事件發生以後爲最。

自北伐勝利兩湖江西先後克復以後，共產黨員活動更烈，黨勢更大，宣傳共

產主義亦愈甚，且有壓迫排擠真正國民黨員之勢。真正國民黨員甚爲憤激，排共之進行亦遂愈甚。迨滬寧克復以後，共產黨竟有不利於國民黨及國民革命之謀，真正之國民黨員益不能忍。

時汪精衛方自海外歸來，各黨部及國民政府要人頗冀其妥爲調解，以求和平解決。自十六年四月五日以後，國民黨要人以漢口中央黨部及國民政府被共產黨把持，所有命令均極顛倒離奇，故迭在上海開談話會，討論應付之法。最後共依汪精衛之主張，暫時容忍，於四月十五日召集中央全體執行監察委員聯席會議於南京，以求和平解決。其後汪精衛忽離滬赴漢，至漢以後，未邀武漢方面之執監委員來寧開會，和平解決無望，中央監察委員吳稚暉乃呈舉發共產黨謀叛之文於中央監察委員會，舉發共產黨如何圖謀剷除國民黨，實行共產主義於中國。中央監察委員會接此呈文後，連日在上海召集緊急會議，議決咨請中央執行委

員會以非常緊急處置，將共產黨首要危險分子分別看管監視，以防止共產黨之謀亂。

南京方面之中央執行委員會委員，於接到監察委員會之咨文後，即議決遵照辦理，咨請國民政府知照軍警機關以非常緊急手段實行驅共，於是兩廣閩浙蘇皖等省，遂有清黨運動之發生，而共產黨員之在以上諸省活動者，遂不得不銷聲匿跡。南京方面之國民黨員，并以武漢國民政府及中央黨部被共產黨把持，乃於十六年四月十八日在南京組織新國民政府，並將中央黨部遷至南京。

武漢方面之國民黨要人，初不同意於寧方之驅共政策。後於六月初旬，發見共產黨之秘密決議，其決議之內容，對於國民黨之生命，不啻加以根本的危害，故政治委員會亦議決實行驅共，而湘鄂贛諸省遂亦有清黨運動之發生。清黨以後，共產黨之首要分子，或被捕殺，或被命令通緝，政治顧問鮑羅庭與軍事顧問嘉倫，

亦已解雇返俄，國民黨勢力範圍以內，似已不復容共產黨之活動矣。

共黨既去，障礙已除，而國民黨內之其他反動分子，亦已漸告肅清，今後國民黨黨員，當盡爲三民主義之忠實信徒，必能化除意見，團結一致，悉奉孫中山先生之遺教，努力奮鬥，於短時期內肅清軍閥，打倒帝國主義，完成國民革命之大業，建造真正獨立自由之中華民國。